

17 OCT 2000

Mahathir-pendatang

MALAYSIA HANTAR BALIK PENDATANG TANPA IZIN TAK BEKERJA

LANGKAWI, 17 Okt (Bernama) -- Malaysia akan menghantar balik pendatang tanpa izin dari Indonesia yang tidak bekerja, kata Datuk Seri Dr Mahathir Mohamad hari ini.

"Mereka yang berada di sini secara tidak sah dan tidak mempunyai pekerjaan, kami terpaksa hantar balik," katanya pada sidang berita bersama Presiden Indonesia Abdurrahman Wahid di akhir perbincangan mereka di Hotel Sheraton Perdana di sini.

Abdurrahman tiba hari ini untuk lawatan kerja dua hari.

Ketika ditanya oleh wartawan Indonesia sama ada Malaysia akan menerima secara sah pendatang tanpa izin Indonesia yang ada, Dr Mahathir berkata: "Jika kami mempunyai pekerjaan untuk mereka, tak apalah.

"Tetapi selalunya mereka datang tanpa mengetahui sama ada mereka boleh mendapat pekerjaan di sini atau tidak."

"Jika mereka menganggur, sudah pasti itu akan menimbulkan masalah kerana ada orang kena beri mereka makan, tempat tinggal dan itu merupakan kos bagi kami," kata Dr Mahathir.

Abdurrahman pula berkata kedua-dua negara bersetuju untuk menanggung kos penghantaran pendatang tanpa izin yang tidak bekerja itu.

"Kita bersetuju untuk pecah masalah bersama. Telah capai persetujuan supaya deportasi mereka ditanggung bersama oleh kedua-dua negara," katanya.

Kehadiran pendatang tanpa izin Indonesia telah menimbulkan masalah ekonomi, kesihatan dan sosial di negara ini.

Menteri Luar Datuk Seri Syed Hamid Albar memberitahu wartawan Malaysia kemudian bahawa agensi-agensi berkaitan di kedua-dua negara akan bekerjasama menghantar pulang pendatang izin Indonesia yang tidak mempunyai pekerjaan.

"Proses menghantar pulang mereka akan berjalan lancar dengan kerjasama agensi di kedua-dua negara di masa depan," katanya.

-- BERNAMA

JM MAI